

## 【老鄰舍】張美容原作

戴在都市肚，隔壁鄰舍相堵頭<sup>1</sup>，盡多就笑笑仔、頷下頭，無麼个有相借問，就算日時頭，儕儕也門門閉戶罕得來往，看著怎樣，佢特別懷念細人仔時个老鄰舍。

頭擺佢戴在莊下个街路肚，鄰舍多，大家長下這家行行、該家奈奈。像對門做西裝个矮師傅屋下，大家就盡愛去，大人會去討兜布尾布截來補衫褲，細人仔就拈兜布碎仔<sup>2</sup>來份家啦，暗晡頭大人做閒地，就在厥店亭下奈涼、打嘴鼓，一群細人仔就坐在做西裝个長桌頂寫作業、讀書，就像自家屋下樣仔。

對門還有一間阿德伯个布店，店肚花刺必駁<sup>3</sup>个布仔，當錫人，佢兜輒輒去看哪埕布仔較靚，到阿姆過家奈該下，就拉等佢去剪布做衫，雖然失望个時節較多，毋過，阿姆个「下二擺、下二擺」，還係分佢盡大个期待。在阿德伯个布店，長下夢想自家著等阿姆做个長衫<sup>4</sup>，有胖胖个袖仔，有胖胖个裙；有加蕾絲，有框木米<sup>5</sup>，像公主樣仔。

「咕咕咕<sup>6</sup>，兩片生翼，背囊局屎，肚底絡食。」隔壁做木匠个阿松柏，緊做事緊做令仔分佢兜揣，在脣項看佢鉋枋仔个細人仔，無人揣得著，阿松柏擎起鉋仔，先撈兩片手扼个柄咕咕噠噠敲核來，就開始鉋枋仔，無用个鉋樓<sup>7</sup>就在鉋仔个背囊頂唻等出，鉋仔肚底个枋仔就鉋到亮亮，做得用哩，原來答案係鉋仔，實在生趣。阿松柏毋單止好講笑，厥屋下滿地泥大大細細个樹砵仔<sup>8</sup>、勾勾勾个鉋樓，也係佢兜最愛搞个東西，到這下，鼻公脣像人還留等香香个木材氣味。

屋下上兩間个點心店也盡記得，一到燂香油<sup>9</sup>个時節，歸街路就香到奈毋得，這間點心店這下係有名个百年老店也，一到奈日，人就多到尖毋開腳<sup>10</sup>。佢也長下會跔在錦榮叔个門口看佢鋸竹仔、破篾仔，像變奇術<sup>11</sup>樣仔，做出竹交椅、竹椅轎<sup>12</sup>、竹桌、竹凳。其他還有剃頭店、糖仔店、冰店、打鐵店等等，逐間就裝滿佢童年个生活。「遠親不如近鄰」，對頭擺个佢來講，非常確實，無想著這下，隔壁鄰舍嘎膠生份人共樣，分人十分个感慨！

- 1 相堵頭：音 xiong✓ du✓ teu✓；面對面遇到。
- 2 布碎仔：音 bu sui e\；碎布。
- 3 花刺必駁：音 fa✓ la✓ bid\ bog\；顏色多而雜。
- 4 長衫：音 cong✓ sam✓；洋裝。
- 5 框木米：音 kiong✓ mug\ mi\；鑲如木耳般皺褶的邊。
- 6 咕咕咕：音 gid gu\ gid；鉋木材的磨擦聲。
- 7 鉋樓：音 pau✓ lo✓；鉋出來的木頭屑。
- 8 樹砵仔：音 su kid e\；小木頭塊。
- 9 燂香油：音 biag hiong✓ iu✓；爆紅蔥頭。
- 10 尖毋開腳：音 jiam✓ m✓ koi✓ giog\；比喻人極多。
- 11 變奇術：音 bien ki✓ sud；變魔術。
- 12 竹椅轎：音 zug\ i\ kieu；嬰兒坐的竹椅。